

2015 - Das Provisoriumsjaar der Aktiven+

Ig ha scho sehr viu Brichte oder eifach süsch Texte gschriebe i de vergangene Johr: als Meitschirieleiterin, als Redaktorin für d'Vereinspost, als Leiterin vo de Aktive, Schlussbricht vom Jugendspieltag 2012 oder wo ig d'Homepage kreierte ha. U ou ar letschte GV ha ig dörfe üses erste Halbjohr vo dr Riege Aktive+ umschriebe.

Aber das Johr harzt's extrem bim Schriebe. Ig ha mehreri Alöif brucht. Zum Glück ha ig ufem Compi chönne umetippe u wieder lösche.... das wäre mängs Blatt Papier gsi, wo zerknittert im rund Ordner glandet wäre.

Söu ig vo de super abwächsligsrieche Turnstunde mit de 15 Turngspändli verzeue, wo jedes Isatz zeigt, hilft leite, Idee bringt u eifach am Chare mit zieht? – Nei, das wüsst dir jo scho aues.

Oder vor Turnfestmedaille? – Nei, die Gschicht kennet dir ou scho.

Oder söu ig schriebe, was für mi ds Vereinsläbe bedütet? – Nei, jedes Mitglied hie dänkt sicher ähnlich oder glich, süsch wäre mir nid zäme imene Verein.

Oder vo üsne interessante, amüsante, sogar lehrriche Gspräch u vom Zämesii ou usserhalb vor Turnhalle? – Nei, das isch gar nid nötig, wöu das wird vo jedere Alterskategorie vom Elki bis zu de Seniorinne genau glich gläbt, wöu me äbe uf jedere Stuefe sini Gmeinsamkeite teilt.

Oder söu ig öich ufzeue, weli Turnerin vo üsere Riege was aues für d'Riege und aber ou riegeübergreifend für ä ganz Verein gmacht het? Weli Ämtli u Kurse sie bsuecht hei, damit das Redli witer dräiht u nid stoh bleibt oder sogar plötzlich rückwärts dräiht? – Nei, so lang weit dir mir gar nid zuelose. Mir aui wüsse, wie lang ds Traktandum Ehrige isch u das isch de bi Witem nid vollumfänglich, was dort verdankt wird.

Oder söu ig öich mini Argumänt für üsi Riege nomou as Härz lege? – Nei nei, ig verschone öich, wöu die Argumänt kennet dir.

Drum mach'ig das jetz churz u bündig u hoffe eifach ganz fescht, dass ig ou nächst Johr wieder darf ä Jahresbricht für d'Riege Aktive+ schriebe.

Liebi Turnergrüess
Andrea Merino